

SIARAN MEDIA

KPWKM TERUS PERGIAT KEMPEN KESEDARAN KANSER REPRODUKTIF WANITA

KUCHING, 3 SEPT – Laporan Registri Kanser Kebangsaan Malaysia 2012 hingga 2016 mencatatkan bahawa kanser payudara kekal sebagai kanser paling lazim dihidapi oleh wanita di Malaysia iaitu 34.1% daripada jumlah keseluruhan pesakit kanser. Golongan wanita juga terdedah dengan kanser serviks yang merupakan penyakit kanser yang lazim dan ketiga tertinggi. Negeri Sarawak mencatatkan kadar insiden kanser serviks yang paling tinggi iaitu 9.6 kes manakala bagi insiden kanser payudara pula mencatatkan 26.4 kes bagi setiap 100,000 orang wanita setiap tahun.

Sehubungan itu, Kementerian Pembangunan Wanita, Keluarga dan Masyarakat (KPWKM) melalui Lembaga Penduduk dan Pembangunan Keluarga Negara (LPPKN) terus mempergiatkan Kempen Kesedaran Reproduksi Wanita (WcaRe) dalam meningkatkan kesedaran semua pihak terutamanya wanita terhadap kepentingan melakukan saringan awal mengesan kanser serviks dan kanser payudara. Menerusi kempen ini, lebih ramai wanita mendapat manfaat berkaitan program pemeriksaan kanser servik dan payudara secara percuma seterusnya bagi mencapai sasaran matlamat global iaitu sifar insiden kanser serviks menjelang 2070.

Program Jelajah Kasih Keluarga Segulai Sejalai yang dilaksanakan oleh LPPKN Negeri Sarawak merupakan usaha-usaha proaktif untuk memberikan kesedaran dan perkhidmatan saringan HPV DNA bagi pengesanan awal kanser serviks dan pendaftaran bagi ujian saringan mamogram dalam mengesan kanser payudara dalam kalangan wanita. Program turun padang ini membolehkan lebih ramai wanita mendapat manfaat dengan inisiatif kerajaan ini.

Seramai 8,634 wanita di negeri Sarawak telah menjalani ujian HPV DNA dan 13 kes disahkan sebagai pra-kanser seterusnya hanya empat (4) kes telah disahkan positif kanser serviks bagi tahun 2019 hingga 2022. Rekod terkini bagi tahun 2023 dengan data sehingga 22 Ogos lalu mendapati seramai 3,587 wanita di negeri ini telah tampil untuk menjalani ujian HPV DNA dan sejumlah 226 kes didapati positif HPV namun sifar (0) kes pra-kanser dan positif kanser.

Sementara itu, bagi program subsidi ujian mamogram yang dimulakan sejak 2007 sehingga tahun lalu, seramai 70,808 wanita negeri ini telah menjalani ujian tersebut. Daripada jumlah tersebut, sejumlah 7,512 kes telah dikategorikan bawah penyiasatan lanjut dan 80 kes disahkan kes positif kanser payudara.

Bagi tahun 2023, seramai **2,957** wanita mendaftar untuk menjalani ujian mamogram dan **2,747** telah pun menjalani ujian dan hasil daripada ujian tersebut seramai **30 orang** dikategorikan perlu menjalankan penyiasatan lanjut dan sehingga Julai lalu, **3** kes positif kanser payudara.

Program turut dihadiri oleh Dato Sri Rohani Abdul Karim, Pengerusi LPPKN, Tuan Haji Abdul Shukur Abdullah, Ketua Pengarah LPPKN dan pemimpin masyarakat setempat.

####

Disediakan oleh:

Unit Penerangan dan Pendidikan

Lembaga Penduduk dan Pembangunan Keluarga Negara (LPPKN)

Negeri Sarawak

011-25056078 (Fiona anak Maurice)